



ANG

Paghimakas

Pabayagan sang Partido Komunista sang Pilipinas ★ Isla sang Negros


Ginaubayan sang Marxismo-Leninismo-Maoismo HULYO 2023

Taas-kamaong pagsaludo kang Ka Rogelio Posadas!

Sundon ang iyang rebolusyonaryong optimismo sa pag-ilog sa inisyatiba aron mapasiguro ang kadaugan sa gubat sa katawhan sa isla sa Negros!

*Komiteng Rehiyunal sa Partido sa Isla sa Negros
Hulyo 20, 2023*

"Taas-kamaong..." sundan sa pahina 2



AP Kaundan

-
- Taas-Kamaong Pagsaludo kang Ka Rogelio Posadas!, p1
- Ang kamatayon sa kauban, p4
- Buhi si Ka Rogelio "Ka Cocoy" Posadas, Dunganon ang Iyang Kinabuhi!, p5
- Pulang Pagsaludo Kanimong, Ka Rogelio Posadas!, p8
- Rogelio 'Ka Cocoy' Posadas, lig-ong kadre sa Partido, p10
- Ka Cocoy (Rogelio Posadas) isip usa ka kauban, p11
- Rebong Diwa nga Iwag, p12

"Ang kasaysayan sa pagpahimulos nagtug-an nga dili niini biyaan ang entablado sa kasaysayan subay sa iyang kabubut-on. Kinahanglan kini nga gub-on pinaagi sa demokratiko-rebolusyonaryong kalihokan sa katawhan." - Ka Rogelio Posadas

"Taas-kamaong..." gikan sa pahina 1

ANG KOMITENG REHIYUNAL SA PARTIDO sa Isla sa Negros (KRPIN), uban sa tibuok ginsakpan sa Partido, mga Pulang kumander ug manggugubat sa New People's Army (NPA), ug mga rebolusyonaryong pwersa sa isla sa Negros, taas-kamaong nagsaludo kang Rogelio "Ka Cocoy" Posadas, 62, nga mihatag sa dakung bahin sa iyang kinabuhi isip tinuod nga alagad sa masang gipahimuslan, hilabi na sa isla sa Negros, hangtod sa iyang kamatayon sa kamot sa berdugong Armed Forces of the Philippines (AFP) niadtong milabay'ng Abril 20.

Gi-abdak si Ka Cocoy, kuyog si Lyngrace Marturillas ug mga drayber sa habal-habal nga sila Renel de los Santos ug Denald Mialen, sa mga elemento sa 303rd Brigade-Philippine Army samtang nagbyahe sa dalan Isabela-Hinigaran niadtong Abril 19, mga alas 6:00 sa gabii. Human sa pila ka oras nga pisikal ug *mental* nga tortyur, gibalhin ang iyang lawas pinaagi sa helikopter sa dili mamatikdan nga oras pagkasunod adlaw didto sa Sityo Cabite, Brgy. Santol, Binalbagan, Negros Occidental, kung diin migasto ang AFP og minilyon ka pesos aron katuohan kintahay nga si Ka Cocoy napatay sa usa ka 10-minutos nga panagsangka batok sa 62nd Infantry Battalion (62IB) ug 94IB. Hangtod karon, ang berdugo nga 303rd Brigade nagpakahilom kalabot sa pinugos nga pagkawala sa iyang mga kaubanan.

Ang hinanaling pagpatay sa mga rebolusyonaryo maoy palisiya sa huyang-sa-pulitika nga mga rehimen, sama sa ilang Duterte ug Marcos Jr. Ang isla sa Negros dunay taas nga listahan sa maayo gyud nga mga rebolusyonaryo sama ni Ka Cocoy nga gipang-salbeyds sa reaksyonaryong estado nga susama sa iyang kauban nga konsultant sa National

Democratic Front of the Philippines (NDFP) nga si Ericson Acosta, tigpamaba sa NPA-Negros nga si Ka Juanito Magbanua (Romeo Nanta), ug mga rehiyunal nga kadre nga sila Kerima Tariman (Ka Ella), Marilyn Badayos (Ka Monet) ug Florida Ceballos (Ka Kelly). Gidakop sila nga walay ikasukol ayha gi-salbeyds nga walay kukaluoy, parehas sa gihimong pagpatay nilang Benito Tiamzon (Ka Laan), Wilma Austria (Ka Bagong-Tao) ug walo ka kaubanan, Jorge Madlos (Ka Oris), Menandro Villanueva (Ka Bok), ug daghan pang uban.

Natawo si Ka Kokoy sa usa ka pamilyang adunahang mag-uuma didto sa Davao. Gipadala siya sa St. Alphonsus Seminary, sa mga paring Redemptorista sa Cebu aron mosulod sa pagkapari. Naimpluwensyahan siya sa nagaulbong makinasnong kalihokan sa mga estudyante ug sa kontrapasistang sentimento panahon sa Balaud Militar. Miduyog siya sa kinabuhi sa batakang masa sa kabus nga taga-dakbayan ug sa komunidad sa mga mag-uuma nga maoy mipukaw kaniya sa tinuod nga kahimtang sa katilingban.

Wala magdugay, gibiyaan ni Ka Cocoy ang personal niyang interes nga mahimong usa ka pari, ug isip baylo, nahimong tibuok-panahong tig-organisa sa sektor sa kabatan-onan-estudyante sa Cebu. Niadtong 1985, nahimo siyang kabahin sa *fact-finding mission* nga nagsusi sa duguong Escalante Massacre.

Tungod sa walay-pagkapalong nga baruganan, narekrut si Ka Cocoy sa Communist Party of the Philippines (CPP) ug human niadto, nagpasakop sa NPA sa Sentral Bisayas. Nahimo siyang kabahin sa

"Taas-kamaong..." sundan sa pahina 3



HULYO 2023

Nagapasalamat ang *Ang Paghimakas* sa mga kontribusyon nga naghimong madaugon niini nga isyu. Sa pagpalambo sa atong *Ang Paghimakas*, giawhag ang tanang tigbasa nga padayong mo-amot og mga balita, piktyur, istorya ug uban pang sinulat. Mangayo man kami sa inyong mga suhestyon ug komentaryo unsaon pa gyud palambuan ang atong bantalaan.

ANG **Paghimakas**



angpaghimakas@protonmail.com



negrosrevportal.wordpress.com

"Taas-kamaong..." gikan sa pahina 2

usa ka tim nga nagpahigayon og *social investigation and class analysis* (SICA) sa rehiyon nga nagsilbing basehan alang sa padayon nga pagpalapad ug konsolidasyon sa rebolusyon.

Sa panahon sa disoryentasyon niadtong ulahing bahin sa dekada '80, si Ka Cocoy lig-on nga mibarug alang sa mga batakang prinsipyo sa Partido taliwala sa rebisyunistang sulog sa pipila ka sakop sa kapangulohan sa CPP. Niadtong sayong bahin sa dekada '90, mitabang siya sa paghatag og edukasyon sa mga kadre sa Partido, Pulang manggugubat ug mga masa sa Sentral Bisayas kalabot sa Ikaduhang Bantugang Kalihokang Pagtul-id (IBKP).

Gi-deploy si Ka Cocoy sa isla sa Negros niadtong 1998 ug, isip sakop sa Probisyunal nga Komiteng Tigpatuman sa isla, gipasiguro niya ang gimbuhatong edukasyon sa Larangang Gerilya 1 (Central Negros Front karon). Ang hugot niya nga paghupot sa Marxistang estilo sa pagtuon miresulta sa iyang mga positibong tampo sa pagrekober, pagpaabante ug subling pagpadasig sa rebolusyonaryong kalihokan sa Negros.

Sa dihang natukod ang KRPIN niadtong 1999, nahimo

siyang kabahin sa Rehiyunal nga Kalihiman isip ikaduhang sekretaryo alang sa edukasyon. Niadtong 2000, nahimo siyang sekretaryo sa Larangang Gerilya 2 (South Central Negros Front karon), ug nangulo sa ekspansyon ug pagrekober pangadto sa southwest Negros. Human ang lima ka tuig, nahimo siyang *Political Commissar* sa Apolinario Gatmaitan Command, ang Regional Operational Command sa NPA sa isla sa Negros.

Sa ngadto-ngadto, nahimong sekretaryo si Ka Cocoy sa North Negros Front (NNF) niadtong 2006, hangtod sa iyang pagkapriso sa San Carlos City, Negros Occidental niadtong 2014. Pinaagi sa giya sa Partido ug sa iyang pagpamuno isip sekretaryo sa NNF, kumprehensibong napalambo ang tulo ka integradong aspeto sa gubat sa katawhan—ang armadong pakigbisog, agraryong rebolusyon ug pagtukod sa baseng masa.

Daghang madaugong anihilatibong taktikal nga opensiba ang nalunsad aning panahona, lakip na ang reyd sa detatsment sa AFP sa Sityo Pulpangyan, Brgy. Bug-ang, Toboso, ug sa Sityo Minabuno, Brgy. Malasibog, Escalante City sa Negros Occidental, nga nakasakmit og kinatibuk-

ang 25 ka tag-as nga riple. Ang mga kontra-pyudal nga kampanya nga nagpatumaw sa mga rebolusyonaryong organisasyong masa ug nagpasayon sa pagtukod sa baseng masa mikatap sa unom ka syudad ug tulo ka lungsod nga adunay mga bungkalan nga naglangkob sa 62 ka asyenda ug sobra 2,000 ektarya nga nakabenepisyo sa 3,000 ka mag-uuma ug mamumuo sa umahan. Sa pagkab-ot sa tulo ka integradong aspeto, dugang milig-on ang Roselyn Jean Pelle Command sa NPA, kung diin midaku ngadto sa tulo ka platun ang prenteng gerilya.

Taliwala sa todo-gera sa rehimeng Duterte sa ulahing bahin sa 2018, si Ka Cocoy ang nahimong sekretaryo sa KRPIN. Usa siya sa mga kadre nga nangulo sa madaugong pagsumada sa 25 ka tuig nga kasinatian sa rehiyon sa paglunsad sa nasudnon demokratikong rebolusyon. Siya ang tigpaduso sa kumprehensibong kampanyang kontrainsirkulo, ug kanunay'ng mibarug alang sa pagtuon sa pakig-away pinaagi sa pagpakig-away. Sa dihang gipahait sa AFP ug Philippine National Police (PNP) ang ilang mga *focused military operation* ubos sa kasamtangang ilehitimong rehimeng Marcos, naningkamot siya nga pangulohan ang KRPIN sa pagsulbad sa mga suliran ug mga kahuyangan nga nagbabag sa rebolusyonaryong kalihokan sa Negros aron hul-os kining makapatigbabaw sa atake sa kaaway ug makapataas sa ang-ang sa gubat sa katawhan sa isla.

Si Ka Cocoy usa ka mapahiubsanon ug masinadyahon nga kauban, kanunay nga nagatuyok sa kampo aron mangita og tugalpo ug ihalas nga uyong aron kaunon. Aduna siya'y kinaiya nga palasiaw samtang nagahunahuna



"Taas-kamaong..." sundan sa pahina 4

"Taas-kamaong..." gikan sa pahina 3

man sa kalisdanan sa mga kauban. Abli siya ug matitud-anon, kugihan sa pagduso sa tukmang pang-ideolohiya, pangpulitika ug pang-organisasyong linya, kun gikinahanglan. Maayo siya sa kritikal nga kinaiya sa pagtuon sa teorya. Naningkamot siya nga makasalmot sa pagpraktika sa rebolusyonaryong gimbuhaton, hilabi na sa pagtabang nga mapahapsay ang krusyal nga mga hisgutanan nga, kung dili mahan-ay, makahatag og kalisdanan sa umaabot.

Migahin siya og oras ug pasensya sa pagpaambit sa iyang rebolusyonaryong kasinatian sa mga batan-ong mga kadre, ug sa pagtudlo kanila bahin sa Marxistang pilosopiya. Bisan pa sa iyang pagkaidaran, wala makapaluya kang Ka Cocoy ang mga sakripisyo ug kalisdanan. Sa panahon sa kalisud, nahimo siyang giya sa rebolusyonaryong optimismo; nagapahinumdom sa mga kauban nga kinahanglang mangandam alang sa opensiba, nga kanunay'ng angkunon ang inisyatiba, ug magmaampingon sa pagbasa sa kahimtang aron mapasiguro ang pagkab-ot sa kadaugan.

Hangtod sa iyang katapusang ginhawa, usa ka rebolusyonaryo si Ka Cocoy. Usa siya ka Marxista nga nagkinabuhi sa giingong hingpit nga kinasing-kasing nga paghalad og kinabuhi alang sa pag-alagad sa katawhan—hilabi na sa mga mag-uuma ug mamumuo sa umahan sa Negros—nga iyang giubanan aron mahibaloan ang ilang kalisdanan, aron makigbisog nga uban nila, ug aron pangulohan sila diha sa pag-angkon sa usa ka katilingban nga adunay tinuod nga kagawasan ug makatarunganon ug malungtarong kalinaw.

Mahimong napatay ang lawas

Ang kamatayon sang kauban

ni Ka Tingting

Hinumdomon ang kauban nga gipalangga
Nga sa mga kamot sa kaaway nagtaliwan na
Tungod sa pag-undang sa mga luha
Kasuko, kaisog ug determinasyon, mohulip na.

Mga luha nga nagatulo sa mga mata
Nahimong likido nga nagsugnod
Sa kaaway nga kasuko
Aron ang kalayo sa rebolusyon magdilaab.

Ang kamatayon sa kauban sa unsa pa mang hinungdan
Tungod sa pasismo sa kagamhanan
Dili katapusan o kahuyangan
Kundili dungganong inspirasyon sa pagsulong sa rebolusyon.

Kamatayon, susama kabug-at sa Kanlaon
Kayahon nga pas-anon
Tungod ang kauban
nag-alagad sa
masang gidaugdaug
ug gipahimuslan
Kauban, padayon ka
namong palanggaon
ug hinumdomon. **AP**



ni Rogelio Posadas, apan gibilin niya ang buhing kabilin sa masidlakong mga kadaugan ug pagtulun-an nga naghatag og giya sa bag-ong henerasyon sa mga rebolusyonaryong Negrosanon kung unsaon ipaasdang ang nasudnon demokratikong rebolusyon. Gipasa niya sa batan-ong mga kadre ang tukmang baruganan, panglantaw ug pamaagi sa pag-atubang sa kumplikado ug bug-at nga mga reyalidad sa katilingban, sa kasaysayan

ug sa pakigbisog sa katawhan. Ang iyang kinabuhi usa ka libro sa mga bulawanong sugilanon sa kung unsa ang tinuod nga paghigugma ug kung unsaon higugmaon ang katawhang Pilipino. Puno sa diwa ni Ka Cocoy, subling mapakyas sa mga Negrosanon ang damgo-sa-udto'ng tutok sa kaaway nga gub-on ang NPA sa Negros nga, sa proseso, mopadilaab ug mopakuyanap sa kalayo sa gubat sa katawhan sa isla! **AP**

Buhi si Ka Rogelio "Ka Cocoy" Posadas, Dungganon ang Iyang Kinabuhi!

ni Ka Felipe Fernando

ANG KAMATAYON NI KA ROGELIO Posadas o Ka Cocoy dili ordinaryo. Siya ug ang mga kauban niya pinugos nga gi-abdak sa mga armadong ahenteng pang-seguridad sa estado ug gidala sila sa usa ka sikretong lugar aron paantuson sa bangis nga pagyatak sa ilang pagkatawo. Giagwanta ni Ka Cocoy ang mga kasakit sa tortyur ug daw mananap nga pagpangabuso samtang nag-atubang sa mga mapanghulga nga interogasyon. Aron maumpawan ang ilang kauhaw sa dugo, gihimo sa berdugong militar ang pagpatay sa walay-ikasukol nga Ka Cocoy, samtang nagpabiling "missing" ang tulo niya ka kaubanan.

Kusganong gikundenar sa katawhan, mga pamilya ug mga *human rights organization* ang pag-abdak, iligal nga pag-aresto, pagtortyur ug pagpatay nga gihimo sa kriminal nga pwersang militar. Si Ka Cocoy usa ka konsultant sa National Democratic Front of the Philippines (NDFP) ug aduna siya'y proteksyon ubos sa Joint Agreement on Safety and Immunity Guarantees (JASIG) nga pinirmahang kasabutan tali sa NDFP ug Government of the Republic of the Philippines (GRP). Kusganon nga ginademanda sab ngadto sa mga kriminal nga militar nga ipakita ang lawas—buhi man o patay—sa mga kaubanan ni Ka Cocoy.

Kinsa si Ka Rogelio Posadas? Unsa ang iyang mga binuhatan nganong gihimo sa mga pwersang pangseguridad sa estado ang bangis nga mga akto sa terorismo?

Dakung bahin sa kinabuhi ni Ka Cocoy, sukad sa panahon nga usa pa siya ka estudyanteng

seminarista aron unta magpari ug hangtod sa ulahing mga adlaw sa iyang kinabuhi, iyang gigamit aron duyogan, suportahan ug alagaran ang masang kabus nga taga-dakbayan, mamumuo, mangingisda ug mag-uuma nga nagantus sa kagutom, gipahimuslan, gidaugdaug ug giterorisa sa gamhanang kumprador-agalong yutaan, dakung burukrata ug mga langyaw'ng kapitalista.

Aduna siya'y lawom nga paghigugma sa katawhang Pilipino, hilabi na sa mga anaksa-buhat nga hut-ong mamumuo ug mag-uuma. Ang iyang paghigugma sa katawhan nanukad sa iyang pag-ila nga ang ilahang interes iya man sab nga interes. Napundar kini ug milawom pinaagi sa iyang pagpakiguban sa inadlaw-adlaw nga pagantus ug pakigbisog batok sa mga mapahimuslanon ug madaugdaugong nagharing hut-ong sa mga dakung kumprador burgesya ug agalong yutaan, ug ilang mga pasistang instrumento. Kini nga pagsalmot sa praktikal nga kinabuhiing sosyo-ekonomiko ug pulitikal uban sa masa ingon man ang iyang maduotong pagtuon sa rebolusyonaryong teorya sa Marxismo-Leninismo-Maoismo, lakip na ang pagtuon sa kasaysayan sa katawhang Pilipino ug sa mga sinulat ni Prof. Jose Maria Sison ug uban pang mga progresibo ug patriyotikong magsusulat, maoy nagpalawom sa iyang syentipikong pundasyon.

Ang gugma ni Ka Cocoy gibaslan man sa masa ug iyang mga kauban og lawom nga pagpalangga. Giila siya karon isip dili mahikalimtan nga bayani ug martir, isip ilang tinuod nga higala ug kauban.

Rebolusyonaryong Kadre sa Sentral Bisayas

Subay sa pipila ka internal nga mga dokumento sa rebolusyonaryong kalihokan, si Ka Cocoy nahimong usa sa mga rebolusyonaryong kadre sa Sentral Bisayas nga nag-abante sa pagpatuman sa mga rebolusyonaryong gimbuhaton nga nakaduon sa pulitikanhong katuyoan sa pagpasulong sa kontradiktadurang nagkahiusang prente pinaagi sa ligal demokratikong kalihokan sa urban sa Cebu ug sa pagpakusog usab sa armadong pakigbisog sa kabani-kanhan sa Bohol ug Cebu. Human mapalagpot ang diktadurang Marcos ug atubangan sa nag-ilis-ilis nga mini nga demokratikong gobyerno, mitumaw ang mga dautang timailhan sa mga internal nga suliran sa mga suhetibong pwersa sa rebolusyon.

Usa si Ka Cocoy sa mga unang naningkamot sa pagtuon sa mga dokumento sa kalihokang pagtul-id sa Partido, ug sa pagbalik-tuon sa mga batakang dokumento sa Unang Kongreso sa Partido, samtang aktibo nga nakig-away batok sa mga mini nga karaang liderato nga nahimong kontra-Partidong rebisyunistang pwersa, nga mibabag sa kalihokang pagtul-id. Kabahin sab siya sa pila ka kadre sa Partido nga naghimo sa kumprehensibong pagsumada sa rebolusyonaryong kasinatian sa Sentral Bisayas aron mapatuman ang mahinungdanong gimbuhaton sa kritikal nga pagsaway ug pagsaway sa kaugalingon. Usa sab siya sa mga nangulo aron dungan nga malunsad ang kampanyang pagtuong

"Bubi..." gikan sa pahina 5

teoretikal sa kinatibuk-ang hanay sa mga rebolusyonaryong pwersa.

Kini nga mga kontribusyon miresulta sa paspas nga rekoberi sa Partido sa Sentral Bisayas, ug kini ang nanguna sa pagbandera sa pagpakusog sa armadong pakigbisog ug nagkahiusang prente sa nasud sa ulahing bahin sa dekada '90. Kini nga mga kadaugan nahimong puhunan aron ang rehiyon makaabag sa ubang mga rehiyon.

Gihatagan ni Ka Cocoy og panahon ang direktang pakiguban ug pag-angkon og kasinatian (gikan sa kawad-on sa direktang kasinatian) sa yunit sa Hukbo diha sa pagpatuman sa tulo ka integradong aspeto sa gimbuhaton sa kabanikanhan—pagtukod sa baseng masa, agraryong rebolusyon ug armadong pakigbisog. Ang maong bahandianong kasinatian iyang gidala sa dihang gi-deploy siya sa Partido sa isla sa Negros.

Bantugang lider sa isla sa Negros

Si Ka Cocoy ang unang kadre sa rehiyon sa Sentral Bisayas nga boluntaryong nagpa-deploy sa isla sa Negros adtong sayong bahin sa 1998 aron dugangan ang dakung pagkunhod sa mga kadre niini. Mitabang siya sa pagpatuman sa Ikaduhang Bantugang Kalihokang Pagtul-id (IBKP) ug sa rekoberi gikan sa dagkung pag-atras ug mga kadaut, ug sa subling pagpaabante sa rebolusyonaryong kusog. Ang iyang naangkon nga ang-ang sa teorya ug praktika sa pagpangulo ug pagpatuman sa IBKP sa gigikanan niyang rehiyon nahimong importanteng kontribusyon aron mahimong madaugon ang pagsulong sa kalihokang pagtul-id sa Negros, sa rekoberi ug subling pagpaaslang sa rebolusyo-

naryong kusog sa kabanikanhan ug kasyudaran, pagpildi sa mga rebolusyonaryong traydor ug pagpakyas sa mga dagkung kampanyang militar sa pag-ensirkulo ug pagpanumpo sa AFP/PNP diha sa nag-ilis-ilis nga rehimen sulod sa tulo ka dekada.

Sa dihang gibalhin sa Negros, padayon nga gipakita ni Ka Cocoy ang naandang estilo sa pagtuon, ug kini nagsalamin sa maayo nga estilo sa pagtrabaho—pagkumbina sa pangkinatibuk-an ug sa partikular, ug pagsulay sa katukmaan sa palisiya o panawagan kung haom ba kini sa partikular nga bahin o sakop. Direkta siya nga nakaangkon og kasinatian sa pagpangulo sa Komite sa Larangan ug walay hunong nga nagpatuman sa rebolusyonaryong gimbuhaton. Nakapapel siya sa pagtukod sa gidak-ong kumpanya nga prenteng gerilya, gikan kini adunay gidak-ong platun nga nag-angkon og relatibong kalig-on sa pagpatuman sa tulo ka integral nga gimbuhaton sa pagtukod sa baseng masa, agraryong rebolusyon ug armadong pakigbisog.

Dugang nahimong bahandi-anon ang paghupot ni Ka Cocoy sa mga batakang prinsipyo sa Partido pinaagi sa amgo nga pagpaningkamot kakuyog sa mga kauban sa pagpahigayon og pagtuon sa partikular nga kasaysayan sa kinabuhi ug mga pakigbisog sa mga masa pinaagi sa katilingbanong imbestigasyon ug pagpanuki-duki. Usa siya sa nagpalawom sa pagpanuki-duki ug pagtuon sa partikular nga kinaiya sa alang-alang pyudal nga sistema sa Negros nga nangunang nakabase sa dominanteng *monocrop* nga produksyon sa kalamay para sa eksport ug sa lokal nga merkado, kung diin diri nagbase ang partikular nga kinaiya sa reaksyonaryong pu-

"Bubi..." sundan sa pahina 7

Usa si Ka Cocoy sa mga unang naningkamot sa pagtuon sa mga dokumento sa kalihokang pagtul-id sa Partido, ug sa pagbalik-tuon sa mga batakang dokumento sa Unang Kongreso sa Partido, samtang aktibo nga nakig-away batok sa mga mini nga karaang liderato nga nahimong kontra-Partidong rebisyunistang pwersa, nga mibabag sa kalihokang pagtul-id.



"Bubi..." gikan sa pahina 6

litika ug ang epekto niini sa kina-buhi ug mga pakigbisog sa katawhan. Kining gihimong pag-tuon nahimong giya aron mapa-asdang ang kuyanap ug mada-ugong pag-okupar ug pag-ugmad sa giangkong kayutaan sa mga agalong yutaan nga kasa-garang gitawag nga asendero.

Mitataw isip iyang signipikan-teng tampo ang pagsiguro nga mapahigayon ang ebalwasyon ug mayor nga mga kongklusyon sa pagsuma sa kasaysayan sa re-bolusyonaryong kalihokan sa Negros sa pipila ka kritikal nga panahon. Sa 2005, sa Ika-duhang Rehiyunal nga Kumperen-sya sa Partido sa Negros, daku ang iyang nahimong papel sa gi-himong pagsumada sa rebolusyo-naryong kasinatian sa isla gikan sa panahon sa kalihokang pag-tul-id. Sa 2016-2018, aduna siyay importanteng kontribusyon sa pagpahigayon sa rehiyunal nga pagsumada ug sa paning-kamot nga mapatigbabawan ang kalisdanan sa pagpapino sa tuk-mang mga leksyon ug ebalwasyon sa partikular nga rebolusyonar-

yong kasinatian, pananglitan sa prenteng gerilya sa north Negros.

Usa ka Tanang-Bahing Marxista

Ang paglambo sa paghupot sa Marxistang estilo sa pagtuon dili hapsay, dili sayon ug wala magsubay sa tul-id nga dalan. Gawas sa kaugalingong kahu-yangan ug limitasyon, adunay mga kalisdanan ug matag-karon-ug-nyang kadaut nga resulta sa bangis nga opensiba militar sa AFP/PNP. Dinhi makita ang paghatag ni Ka Cocoy og dakung importansya sa tukmang estilo sa pagtuon pinaagi sa pagkum-bina sa teorya ug praktika. Kung unsa ka lalom ang iyang paghigugma sa masa, mao man kalalom ang iyang pagtuboy sa dayalektika sa teorya ug praktika, paghibalo ug pagpatuman; gikan sa hamubo nga ang-ang sa kahibalo padulong na sa nagkataas nga ang-ang sa kahibalo.

Giila ni Ka Cocoy nga dili hamis ug dili hingpit ang paglambo sa mga butang. Moagi kini sa proseso sa pagsulay ug dili niini malikayan ang sayop.

Tungod sa pag-ila sa daya-lektika sa tukma ug sayop, gi-pakita ni Ka Cocoy ang kama-hinungdnon sa prinsipyo ug praktika sa pagsaway ug pag-saway sa kaugalingon, ug sa kondukta sa panangbangi sa mga ideya. Talagsaon ang iyang gipakitang pagkamatinud-anon sa paghupot sa pagsaway ug pagsaway sa kaugalingon tali-wala sa kumplikado ug hait nga mga kasinatian sa usa ka prenteng gerilya ug sa ang-ang sa rehiyon sa Negros. Iyang gi-pakita ang kaandamon sa pagresolbar sa mga suliran ug hisgutanan pinaagi sa himsog nga panangbangi sa mga ideya sulod sa proseso sa organisasyon, ug human sa malangkubong proseso, mopailalom ang tanan ug mopatuman sa nakab-ot nga kongklusyon o desisyon sa ma-yorya sa kolektibo.

Sa kinatibuk-an, kining mga paninguha ni Ka Cocoy sa pag-pauswag sa iyang estilo sa pagtuon milahos sa iyang estilo sa pagpangulo ug pagtrabaho nga nagsubay sa prinsipyo sa

"Bubi..." sundan sa pahina 8

Pulang Pagsaludo Kanimong, Ka Rogelio Posadas!

Mensahe sa Leonardo Panaligan Command-NPA Central Negros Front

USA KA MILITANTE UG TAAS-KAMAONG pagpasidungog ang ginahatag sa Leonardo Panaligan Command – New People's Army Central Negros Front (LPC-NPA) ug sa kinatibuk-ang rebolusyonaryong masa sa central Negros kang Ka Rogelio Posadas (Ka Cocoy) sa iyang mga kontribusyon ug kabilin nga nagpalig-on sa determinasyon sa mga kauban ug tibuok rebolusyonaryong kalihokan aron atubangon ang lain-laing porma sa mga hagit sa panahon sa pagsubay sa dalan sa rebolusyon sa isla.

Si Ka Cocoy giila sa tibuok rebolusyonaryong pwersa sa isla tungod sa iyang kinaiya nga tig-edukar ug tigpadasig sa masa ug mga kauban. Kalma kung molsulti apan lalom ug hait sa paganalisa sa kahimtang sa usa ka dayalektikal nga pagsulbad sa mga nagtunhay nga suliran, internal man o eksternal.

Iyang optimismo ug determinasyon ang mahinumduman sa masa ug mga kauban kabahin kang Ka Cocoy. Usa siya sa mga isog ug determinadong kadre sa Partido sa isla nga nakig-away batok sa mga rebisyunista ug

oportunistang traydor nga misipak sa linya, gimbut-an ug mga batakang prinsipyo sa Partido ug uban pang kasaypanan sa ideolohiya, pulitika ug organisasyon niadtong dekada '90. Buhi-kamatayon si Ka Cocoy nga misalom sa mga organisasyong masa, yunit sa Partido ug NPA diha sa pagpukaw, pag-organisa ug pagpalihok sa masa ug tibuok nga rebolusyonaryong pwersa aron pangulohan ang simpleng pagpakabuhi ug maduotong pakigbisog diha sa pagpatigbabaw sa tanang unos sa rebolusyon ubos sa espiritu sa Ikaduhang Bantugang Kalihokang Pagtul-id.

Gikan sa gamay nga kusog sa Partido ug NPA, ug hikitin nga baseng masa nga gibunga sa pagkaganoy sa mga rebisyunistang traydor sa suhetibismo, Wala ug Tuong oportunismo, burukratismo ug ultra-demokrasya, pursigido si Ka Cocoy uban sa mga responsableng kadre sa pagtukod sa mga prenteng gerilya sa isla. Bisan pa man sa bagyo sa pasismo, nahimong kapakyasan sa kaaway sa hut-ong ug mga bangis nga makinarya niini nga AFP, PNP ug

binayrang Revolutionary Proletarian Army-Alex Boncayao Brigade (RPA-ABB) nga pugngan ang pagtukod sa lima ka aktibong prenteng gerilya sa isla.

Midaku ang ihap ug mikusog ang mga yunit sa NPA, ug samot nga milapad ug milig-on ang baseng masa pinaagi sa hugot ug absolutong pagpangulo sa Partido. Nahimong kumprehensibo ang pagsulong sa gubat sa katawhan gikan sa dekada '90 hangtod karon nga panahon sa rehimeng US-Marcos II.

Dawat ni Ka Cocoy nga ang imperyalismo, pyudalismo ug burukrata-kapitalismo mao ang gamot sa lalom nga kakabus sa nasud. Suhito siya sa kasaysayan sa nasud ug hingpit niyang nasingop nga alang-alang kolonyal ug alang-alang pyudal ang kinaiya niini, kung diin kuyanap ang pagpahimulos ug pagpanaugdaug sa usa ka porsyento nga agalong yutaan, dagkung kumprador burgesya ug burukrata kapitalista uban sa ilang amo nga imperyalistang Estados Unidos. Kumbin-

"Pulang..." sundan sa pahina 9

"Buhi..." gikan sa pahina 7

linyang masa, pukaw nga disiplinadong paglihok ug kritikal sa kaugalingong pagtuon sa kolektibong praktika.

Tukma ang pagsabot ni Ka Cocoy kabahin sa pundamental nga tesis ni Lenin nga, "kung walay rebolusyonaryong teorya, walay rebolusyonaryong kalihokan" ang mga masa sa katawhan. Buhi si Ka Cocoy pinaagi sa iyang gibilin nga mga

maayong sulundon ug pagtulunan gikan sa iyang mga positibo ug negatibong kasinatian. Ang iyang paghigugma ug pagalagad sa masang Pilipino sulod sa halos 40 ka tuig nahimong ligon, syentipiko, maduoton ug gani, padayon nga nahimong ligon atubangan sa mga bug-at ug kumplikadong mga suliran sulod sa rebolusyonaryong kalihokan ug mga miresultang kadaut gikan sa kusganong teroristang kampanyang militar sa AFP/PNP sa

mga pahoy nga rehimen.

Gipahinumdum usab nga ang mga tampo ni Ka Cocoy iyang nahimo kuyog ug sa pagtinabangay sa daghan pang susama niyang mga maayong rebolusyonaryo sulod sa giingong mga katuigan. Mao nga atong sublion pag-ingon: Buhi si Ka Cocoy ug bantugan ang kinabuhi niya ug sa uban pang mga martir sa rebolusyong Pilipino! **RP**

"Pulang..." gikan sa pahina 8

Kumbinsido siya nga ang demokratikong rebolusyon sa katawhan pinaagi sa malanatong gubat sa katawhan diha sa gambalay sa armadong pakigbisog ang nag-inusarang solusyon sa pagpatuman sa tinuod nga reporma sa yuta ug nasudnong industriyalisasyon.

sido siya nga ang demokratikong rebolusyon sa katawhan pinaagi sa malanatong gubat sa katawhan diha sa gambalay sa armadong pakigbisog ang nag-inusarang solusyon sa pagpatuman sa tinuod nga reporma sa yuta ug nasudnong industriyalisasyon.

Nagatuo man si Ka Cocoy nga ang pagbarug sa nagkalain-laing mga hut-ong sa katilingban diha sa nasudnong nagkahiusang prente nga gipangulohan sa abanteng destakamento sa hut-ong proletaryado nga mao ang Communist Party of the Philippines maoy nagsilbing kusog sa hut-ong anak-sa-buhat aron pukanon ang mga kaaway sa hut-ong. Mao nga gikan sa dekada '80, padayon nga gisubay sa usa ka Rogelio Posadas ang dalan sa armadong pakigbisog, hilabi na ang pagpakig-away sa bangis nga *martial law* sa kanhi diktadurang US-Marcos Sr hangtod karon sa rehimeng US-Marcos Jr.

Kini nga makasaysayanong kaagi ni Ka Cocoy sa pagrebolusyon ang sulundon ug nagsilbi nga inspirasyon sa mga kabatan-onan ug aktibista sa kasyudaran ug kabanikanhan sa pagpadayon sa armadong pakigbisog. Kini ang sulundon ug inspirasyon sa mga batan-ong kadre sa Partido ug mga Pulang kumander ug manggugubat sa NPA sa pagpasulong sa armadong pakigbisog aron padaugon ang gubat sa katawhan hangtod nga makab-ot ang nasudnong kagawasan ug demokrasya.

Ka Cocoy, buhi ka nga handumanan sa among pagpadayon sa armadong rebolusyon!

Tiunay kang bayani sa rebolusyon!

Ikaw ang among inspirasyon sa pagpadayon!

Mabuhi ka, Kauban!

Mabuhi ang tanang mga rebolusyonaryong martir! **AP**



Rogelio 'Ka Cocoy' Posadas, lig-ong kadre sang Partido

Mensahe sa Rachele Mae Palang Command - NPA Southeast Negros Front

ANG MGA KADRE SA PARTIDO, mga Pulang kumander ug mang-gugubat, ug ang kinatibuk-ang rebolusyonaryong pwersa sa Rachele Mae Palang Command sa New People's Army (RMPC-NPA) nagahatag sa pinakataas nga Pulang saludo kang Rogelio 'Ka Cocoy' Posadas, kanhing sekretaryo sa KRPIN. Tungod sa iyang indibidwal ug kolektibong tampo, ang rebolusyonaryong kalihokan sa isla nagpabilin sa gihapon taliwala sa walay hunong nga mga pasistang pagpangataki sa rehimeng US-Duterte nga gisundan dayon sa ilehitimong rehimeng US-Marcos II.

Pinaagi sa absolutong pagpangulo sa KRPIN, nahimo sa NPA Negros nga mapatigbaban ang duyuong kontra-insurhensyang gubat sa kaaway. Sa paghupot ug pagpamilyarisa sa gerilyang taktika sa pagbalhin, konsentrasyon ug dispersal, napreserba sa mga yunit sa NPA ang kaugalingon ug tukmang nakapahaom sa kahimtang taliwala sa abanteng hinagiban ug teknolohiya sa kaaway. Mas gipasamot ang sosyo-ekonomiko ug makitawhanong krisis sa isla sa dihang minilyon ang gigasto sa AFP, PNP ug National Task Force (NTF)-ELCAC alang sa mga gipahigayong *focused military operation*, pinugos nga pagpasurrender, operasyong saywar, mga pekeng engkwentro, ug kuyanap nga paglapas sa tawhanong katungod, nga dugang nagkumbinsi sa katawhan nga ang paglunsad lamang sa gubat sa katawhan ang makahaw-as sa ilang nagtunhay nga kahimtang.

Partikular sa southeast Negros,



ang sugilanon kalabot sa giingong 'gibungkag' nga prenteng gerilya nagpabilin nga hinimo-himo lamang. Si Ka Cocoy ang usa sa mga lig-ong kadre sa Partido nga naggiya sa mga rebolusyonaryong pwersa sa prenteng gerilya aron atubangon ang mga kalisdanan, bisan unsa pa man kini kabug-at. Kanunay niyang ginaingon nga, "Makaya nato kini tungod anaa ang masa!" Gipahinumduman niya ang mga kauban nga ang masa mao ang walay pagkahubas nga tuburan sa inspirasyon aron mapadayon ang mga mapang-away nga tahas sa NPA.

Gani, makalagot gayud nga si Ka Cocoy gipatay nga walay

kukaluoy sa mga pwersa sa estado, samtang ang iyang kauban ug duha ka drayber gi-missing sa 3rd ID.

Kung ang tuyo sa kaaway mao nga paluyahon ang mga rebolusyonaryong pwersa pinaagi sa makalilisang nga pagdakop ug unya pagpatay sa mga hors de combat, balikon nato ang giingon ni Ka Cocoy: samtang anaa ang pagpanaugdaug, magpadayon ang suporta ug paghigugma sa masa ngadto sa NPA, ug bisan unsa pa ka daku ang pinatuyang nga paggasto sa militar, dili kini makabungkag sa pangandoy sa katawhan alang sa rebolusyonaryong pagbag-o. **AP**

Si Ka Cocoy (Rogelio Posadas) isip usa ka kaupod

ni Ka Lobel

Pulang manggugubat gikan sa Mt. Cansermon Command-NPA South Central Negros Front

DILI GAYUD MALIMTAN ISIP USA ka rebolusyonaryo, hilabi na diri sa Negros, ang bulawanon nga tampo ni Kaubang Rogelio Posadas o mas nailhan nga si Ka Cocoy/Tomas/Totie sa mga kauban sa south central Negros. Usa siya ka sulundon ug inspirasyon sa daghang mga kauban ug rebolusyonaryong pwersa tungod sa iyang hingpit ug tininuod nga pagkarebolusyonaryo.

Dili lamang isip maayong rebolusyonaryo ang pag-ila sa mga kauban kang Ka Cocoy. Usa sab siya ka amahan, hait nga kumander, magtutudlo, ug hilig nga mokanta.

Amahan tungod suod siya sa mga kabatan-onan, ug sa mga kauban kanunay gyud nimong madungog ang iyang mga tambag nga daw amahan kung imo siyang kaistorya.

Hait siya nga kumander tungod gawas sa iyang maayo nga pagpangulo sa armadong pakigbisog diri sa Negros, kanunay gyud niyang ginatudloan ang mga Pulang manggugubat ug kumander sa mga prinsipyo ug balaud sa dagan sa gubat sa katawhan. Kasagarang madunggan gikan sa iyaha: "Kanunay isilsil sa panumduman ang pagkasundalo sa katawhan, ug dili gayud kalimtan nga ang kaaway nagatake nato, ug sa matag panahon, nagahunahuna sila kung unsaon kita dugmokon. Mao nga kinahanglan dili gyud magpakaliberal, hilabi na hisgutanan sa siguridad." Nahimong pagtulunan kini sa mga kauban nga dili simple ang pagrebolusyon tungod nag-atubang kita sa kinabuhi-ug-kamatayong gimbuhaton, ug prinsipyo kini nga angayang huptan, hilabi na nga nagpaas-

dang kita sa armadong rebolusyon.

Maalam ug nindot nga kaisortorya si Ka Cocoy. Hilig niya ang syensya, partikular ang astronomiya. "Kahibalo ba kamo kung unsa ang *star* nga labing duol sa *Earth*?" ang kasagran niyang pangutana sa mga kauban. Hilig sab niya ang mga salida nga *science fiction* sama sa *Star Wars*. Daghan mi'g malangkob nga mga istorya kung mao ni ang mga topiko ug mga rebolusyonaryong hisgutanan ang istoryahan.

Sa dugay niyang pagrebolusyon, gipakita ni Ka Cocoy sa praktika kung unsa ang usa ka proletaryado. Bisan og idaran na siya, makita nimo ang kadasig ug determinasyon sa bisan unsang sakripisyo ug kalisdnan nga maagian sa pagpasulong sa rebolusyon. Daghan man ang mga limitasyon hilabi na sa iyang panglawas, apan mas nagpatigbabaw gihapon ang rebolusyonaryong diwa nga kutob sa iyang makaya, ipasulong gayud ang armadong rebolusyon.

Kang Ka Cocoy makita ang "simpleng panginabuhi ug maduotong pakigbisog." Usa siya sa pinakamaayo nga maestro nga nagatudlo dili lang sa teorya, kundili sa praktika usab. Ug syempre, adunay panahon nga nagakanta siya sa mga rebolusyonaryong awit samtang nag-earphone. Madungog nimo ang iyang pagkanta nga abi nimo nagbasa lamang.

Tinuod nga bisan malukat ang pinakadaku nga kahoy sa lasang, kini na sab ang maghatag sa lat-ang nga agian sa kasanag sa adlaw aron mas daghan pang mga kahoy ang motubo. Dili mausik ang kinabuhi

nga gibuhis ni Ka Cocoy tungod ang iyang dugo maghatag og katambok sa yuta alang sa rebolusyon. Magpabilin nga buhi ang iyang mga pangandoy ug padayon kining sumpayan sa bag-ong henerasyon.

Mabuhi ang dungganon rebolusyonaryong si Ka Cocoy! Mabuhi ang rebolusyon! **RP**

.....   **NegrosRevPortal**

Usa sa mga kanta nga ulihing nadunggan nga ginkanta ni Ka Cocoy:

Lupang Sinira

Bayang mahiwaga sa malayong silangan

Alab ng puso, sa dibdib mo'y apoy

Lupang sinira, bayan ng magigiting

Sa manlulupig hindi pagagapi

*Sa nayon at lungsod
Nagkaisa makabayang mamamayan*

*May tilamsik ang tula at awit
Sa paglayang inaasam*

*Ang kulay ng watawat mo'y
Tagumpay na magniningning
Ang bituin at araw niya'y
Hindi magdidilim*

*Laya ay langit kaluwalhati't pagsinta
Buhay ay lupa sa piling mo
Aming ligayang makitang
Ang baya'y di api
ang mamatay ng dahil sa iyo.*

Rebong diwa nga iwag

ni Ka Adelle Malaya

Nawala man ka diri sa kalibutan
Apan nagpabilin ka sa among hunahuna
ug kasing-kasing
Ang imong mapangahasong pag-alagad
sa katawhan
Nahimong inspirasyon ug giya
kanamong tanan.

Saludo kami sa imong rebong
proletaryong kapukawan
Hut-ong gigikanan, gisalikway ug
gipatigbabawan
Burgis nga huna-huna, gipakigbisogan
bisan pa sa kalisdanan
Abli ang kaugalingon sa mga pagsaway
sa kahuyangan.

Ang imong rebong kaisog ug kaalam,
dili gayud namo malimtan
Diha sa pagpasulong sa armadong
pakigbisog sa kabanikanhan
Hinungdan nga ang kaaway sa hut-ong
matandog ang paghari ug masakitan
Ug nagapaningkamot nga gub-on ang
armadong kalihokan.

Unsaon pagguba sa himsog nga binhi
nga gipugas sa tabunok nga kayutaan?
Yuta nga imong giamoma aron binhi
motubo bisan asa pa man
Nga magsilbi sa gidaugdaug ug gipahimuslan
Apan ang kaaway sa hut-ong desperado nga
naghimo sa pasistang lakang.

Ang imong pagpangulo nahimong inspirasyon
sa among tanan
Ikaw Partido nga sama sa himsog nga binhi
nga nag-alagad sa katawhan
Ang katawhan sama sa usa ka tabunok
nga kayutaan
Ug ikaw ang among instrumento aron
himsog nga binhi mokuyanap.

Apan pasistang kaaway, desperado nga
bungkagon ang kayutaan
Nagpakatap sa hilo aron binhi mawala
ug madaut
Ikaw gidakop ug gipatay sa mga dautan
Sa pagtuo nga maguba ang rebong kalihokan.

Ilang pangandoy nga pagguba
siguradong mapakyas
Tungod ang imong rebong diwa migamot na
sa nakigbisog nga katawhan
Usa ang mawala, daghan ang mapukaw
ug magpadayon
Aron gun-ubon ang sistemang maulipnon.

Bayani ka sa nakigbisog nga katawhan
Sama ka sa bituon sa kalangitan
Bisan layo ka sa among panan-awan
Apan ang imong rebong diwa nag-iwag
sa among dalan.

Dalan nga puno sa kangitngit,
apan among subayon
Tungod anaa sa imong iwag ang giya
sa among dalang pagalakton
Ang imong kamatayon nahimong hagit
namong magpadayon
Naghatag kaisog aron kalisdanan
among mapatigbabawan.

Dili mo man masaksihan,
atong hingpit nga kadaugan
Apan ikaw nahimong kabahin
sa rebong kasaysayan
Tungod ikaw proletaryong bayani sa katawhan
Imong diwa nga maduoton sa pagduso sa
katawhan, dili gyud namo mahikalimtan. **AP**

